

08/05/2003

PM lepaskan perenang Kuala Perlis-Langkawi

KANGAR: Perdana Menteri, Datuk Seri Dr Mahathir Mohamad, dijangka melepaskan seorang rakyat tempatan berenang dari Kuala Perlis ke Langkawi sejauh 48 kilometer ketika lawatannya ke Perlis 24 Mei ini.

Menteri Besar, Datuk Seri Shahidan Kassim, berkata perenang itu, Abdul Malik Mydin, 28, akan dilepaskan dari jeti Kuala Perlis.

Abdul Malik, dari Pulau Pinang, dijangka dilepaskan pada petang 24 Mei dan dijangka tiba di Dataran Lang, Langkawi keesokannya.

Acara itu adalah sebagai persediaan lelaki terbabit berenang merentas Selat Inggeris.

Shahidan berkata, selain merasmikan loji jana kuasa bebas (IPP) di Sungai Baru, Perdana Menteri akan turut mengadakan perjumpaan dengan pegawai kerajaan dan pemimpin Umno negeri dan parti komponen Barisan Nasional (BN) Perlis.

Sementara itu, Shahidan berkata Timbalan Perdana Menteri, Datuk Seri Abdullah Ahmad Badawi, pula dijangka melawat Perlis pada 2 Jun depan.

Abdullah dijadual menyempurnakan majlis pecah tanah projek Kolej Universiti Kejuruteraan Malaysia (KUKUM) dan berjumpa dengan pegawai kerajaan dan pemimpin BN negeri.

"Konvensyen Umno Perlis pula akan diadakan pada 3 Jun," katanya.